

清

史

稿

清史稿

列傳一百四十四

吳熊光

汪志伊

陳大文

熊枚

裘行簡

方維甸

董教增

吳熊光字槐江江蘇昭文人舉順天鄉試乾隆三十七年登中正榜授內閣中書充軍機章京累遷刑部郎中改御史當罷直大學士阿桂素倚之請留直如故阿桂屢奉使出勦匪治河閱海塘讞獄熊光輒從累遷通政司參議嘉慶二年高宗幸熱河夜宣軍機大臣未至命召章京熊光入對稱旨欲擢任軍機大臣和珅稱熊光官五品不符體制因薦學士戴衢亨官四品在軍機久用熊光不如用衢亨詔同加三品卿銜入直居政府六閱月和珅忌之出爲直隸布政使四年高宗崩仁宗親政和珅伏誅熊光言和珅管理各部日久多變舊章以營私大慙雖除猾吏仍可因緣爲奸亟宜更正上聽之擢河南巡撫教匪逼境

熊光駐防盧氏張漢潮竄商州分掠藍田疏請截留山東兵赴明亮軍協剿復以張天倫竄近鄖陽江岸謀犯豫南調直隸正定標兵備剿上以所見與合詔嘉獎尋漢潮趨維南遣總兵張文奇田永桐擊走之令南汝光道陳鍾琛扼襄河要隘糧道完顏岱率滿營兵協防撥壽春鎮兵五百駐樊城請召募練兵五千並以開封練勇千名改爲撫標新兵從之五年楚匪自均州鄖縣窺渡襄河賴預防擊退上念河南兵單命直隸山西遣兵赴援又命添募鄉勇熊光疏言河南盧浙一帶原有鄉勇萬餘而賊竄自如凡游民應募賊至先逃反搖兵心是以上年撤勇添兵賊未敢肆此兵勝於勇之明驗今有直隸等省官兵擇要駐守已足策應無庸募勇七月殲寶豐邾縣潰匪於彭山教首劉之協遁葉縣就禽予議叙六年擢湖廣總督途遇協防陝西兵二百餘人逃回本營廉得其缺饗狀杖首謀者二人餘釋不問房縣鄉勇糾搶民寨縛送三十餘人立誅之提督長齡巡撫全保率師防剿迭敗湯思蛟劉朝選等川匪擾興山竹谿房縣分兵追剿殲獲甚衆平樊人傑餘匪俘賊首崔宗和上以熊光調度供支迭詔

褒獎新設湖北提督改移鄖陽鎮協添兵三千五百名即以無業鄉勇充之又奏定稽查寨勇章程略言寨勇習於戰鬪輕視官兵流弊不可不慮今將寨堡戶口器械逐一登記陽資其力以助此日之軍威默繫其綱以弭將來之民患上雖其言七年三省匪平加太子太保遣撤鄉勇以叛產變價給賞詔嘉其節九年劾湖南巡撫高杞違例調補知縣杞坐降調未幾侍郎初彭齡劾熊光受汚陽知州秦泰金及兩淮厘費上詰彭齡以得自高杞對命巡撫全保按驗無迹彭齡杞俱獲譴傳諭熊光返躬自省平心辦事戒勿躁妄十年調直隸時兩廣總督那彥成與湖廣總督百齡互訐命偕侍郎托津赴湖北按之百齡被訐事有迹方鞫治未定讞那彥成亦以倡撫洋盜逮京調熊光兩廣總督會直隸官吏勾通侵帑事發歷任總督藩司俱獲譴上以熊光任藩司無虛收任總督無失察特詔嘉之十三年八月英吉利兵船十三艘泊香山雞頸洋其酋率兵三百擅入澳門占踞礮臺兵艦駛進黃埔熊光以英人志在貿易其兵費出於商稅惟封關足以制其死命若輕率用兵彼船礮勝我數倍戰必不敵而東

南沿海將受其害意主持重逾月始上聞言已令停止開船俟退出澳門方準貿易上以熊光未卽調兵故示弱嚴詔切責洋船遷延至十月始陸續去下吏議褫職効力南河百齡代其任疏言熊光蒞閩上益怒遣戍伊犁逾年召還授兵部主事引疾歸道光八年重與鹿鳴宴加四品卿銜十三年卒于家年八十四熊光嘗曰刑賞者聖主之大權而以其柄寄於封圻大吏若以有司援案比例求免駁斥之術處之外矣刑一人而有益於世道人心雖不符於例所必及也不得請必再三爭乃爲不負若憂嫌畏譏隨波逐流其咎不止溺職而已當調直隸入覲上曰敎匪淨盡天下自此太平熊光曰督撫率郡縣加意撫循提鎮率將弁加意訓練百姓有恩可懷有威可畏太平自不難致若稍懈則伏戎於莽吳起所謂舟中皆敵國也及東巡返迎駕夷齊廟與董誥戴衢亨同對上曰道路風景甚佳熊光越次言曰皇上此行欲稽祖宗創業艱難之迹爲萬世子孫法風景何足言耶上有頃又曰汝蘇州人朕少扈蹕過之其風景誠無匹熊光曰皇上所見乃剪綵爲花蘇州惟虎邱稱名勝實一墳堆之大者

城中河道逼仄，蕘船擁擠，何足言風景。上又曰：如汝言皇考何爲六度至彼，熊光叩頭曰：皇上至孝，臣從前侍皇上謁太上皇帝，蒙諭朕臨御六十年，並無失德，惟六次南巡，勞民傷財，作無益害有益，將來皇帝如南巡而汝不阻止，必無以對朕仁聖之所悔言，猶在耳。同列皆震悚，壯其敢言。後熊光告人墳堆蕘船兩語，乃乾隆初故相訥親奏疏所言重述之耳。熊光晚年著伊江筆錄，春明補錄，葑溪筆錄，三書紀所聞名臣言行，多可法云。

汪志伊字稼門，安徽桐城人。乾隆三十六年舉人，充四庫館校對，議叙授山西靈石知縣。除徵糧擾累，刻木爲皂隸書，里分糧數，以次傳遞，民遵輸納，調榆次、遼霍州、直隸州知州。代州民孟木成殺人，已定讞，情實其弟代呼冤。巡撫勒保檄志伊往按，平反之。承審者護前失，不決命。大臣臨鞫，重違衆議。志伊堅執與爭，孟木成竟得免死。志伊以此負強項名。擢江蘇鎮江知府，調蘇州，連擢蘇松糧道、按察使。乾隆五十八年，遷甘肅布政使，調浙江、江浙，漕重積弊，由官吏規費多。志伊歷任皆先除規費之在官者，然後以次裁革，嚴設科條。嘉慶元年，以

杭州乍浦駐防營養贍錢三月未放被劾議降二級調用詔以志伊平日操守尚好加恩授江西按察使二年遷福建布政使未數月就擢巡撫時海盜方張仁宗於閩事特加意志伊屢疏陳水師人材難得請寬疏防處分變通選補章程副參以上兼用本省之人以下兩省通融撥用又州縣徵糧處分過嚴升調要缺難得合例請人地相需者不拘俸滿參罰皆允行詔飭嚴懲會匪及械鬪惡習五年疏報漳泉一帶匪徒節經勦捕均知斂迹諭曰滋事不法有犯必懲不可無事滋擾責以鎮靜不可姑息養奸亦不可持之太蹙尋奏龍溪詔安馬港海澄四廳縣遵員治理民不械鬪諭曰一經良有司整飭改除積習是小民不難化導要在親民之官得人當於平日遴選賢員俾實心任事爲正本清源之道志伊薦閩縣知縣王紹蘭上素知其人詔嘉志伊能留心察吏旣而偕總督王德疏請泉州知府錢學彬改京職上斥疏語矛盾尋究得學彬任聽家人舞弊婪贓事坐察吏不明議革任特寬之六年病請解職八年起署副都御史刑部侍郎授江蘇巡撫給事中蕭芝請就產米之鄉採買由海運京下議志伊

言其不便罷之九年清江浦淤淺糧船停滯上慮京倉缺米詔志伊預籌請碾常平倉穀三千石備撥以新漕減運命酌量採買志伊疏言安徽民田有一歲兩收者各令七月完納漕糧九十月可運通江西湖廣亦如之上以一歲兩徵近加賦且來歲仍屬短絀斥爲迂繆尋奏採米十二萬石搭運報聞時江北淮揚水災徐海苦旱志伊手編荒政輯要頒屬吏爲賑濟之法蘇州人文薈萃增設正誼書院課士奏請頒御製詩文集於江南各書院上勿許曰朕之政治即文章何必以文字炫長耶十一年擢工部尙書未幾授湖廣總督川楚餘匪散匿洞庭湖環湖數府州多盜志伊多選幹吏偵訪檄下分捕盜無所匿濱江地自乾隆末大水湮沒民田未復親駕小舟歷勘疏塞建二閘於第江口福田寺以時啟閉十六年調閩浙總督先是湖北應山民喻春謀殺人其母以刑求誣服控於京命志伊提鞠同知劉曜唐等誘供翻案以無辜之葉秀承兇而無左證巡撫同興爲之平反奏劾至是入覲召對爲劉曜唐等剖辯願代認處分上斥其偏執嚴議革職改留任捕誅海盜黃治其黨吳屬乞降時降盜多授官志

伊曰是獎盜也仍依律遣戍舊有天地等會匪熊毛者創立仁義會授張顯魯傳煽事覺顯魯伏誅毛遁募甯化生員李玉衡捕殺之奏賜玉衡舉人布政使李廣芸廉吏也爲志伊所薦舉至監司會龍溪知縣朱履中以不職劾因訐廣芸婪索遽劾訊履中已自承誣告志伊因執駁詰福州知府涂以輔迎合逼供廣芸自經死輿論大譁二十二年命侍郎熙昌副都御史王引之往按得其狀詔斥志伊衰邁謬誤褫職永不叙用志逾年卒伊矯廉好名自峻岸岸仁宗初甚嚮用時論毀譽參半焉卒以偏執獲咎

陳大文河南杞縣人原籍浙江會稽乾隆三十七年進士授吏部主事典廣東鄉試累遷郎中四十八年出爲廣西南甯知府擢雲南迤東道歷貴州安徽按察使江甯布政使皆有聲父憂歸服闋補廣東布政使總督朱珪薦大文操字廉潔化其偏僻可倚用詔人才難得命珪加以勸迪俾成有用才嘉慶二年擢巡撫海盜方熾大文以運鹽爲名集商船載鄉勇出洋擊沈盜船六斬獲二百餘人賜花翎屬縣不職者列案劾治詔嘉其捕盜察吏皆有實心予議叙尋兼

署總督四年調山東巡撫濟曹兩府水災興工代賑州縣玩視者立劾有拙於催科而輿情愛戴者疏請留任禁漕對旅丁陋規五年丁母自憂乾隆末山東大吏多不得人吏治日弛大文性深嚴見屬吏溫顏相對使盡言然後正色戒之曰汝某事賄若干吾悉知不速改彈章已具草矣人莫不畏之尤銳剔漕弊杜浮收官吏被告發劾治者三十餘人及去任時其摘印在繫未經奏劾者尙七八人事上聞詔布政使分別省釋六年畿輔大水大文服將闕特召署直隸總督疏請大賑提早一月以救災黎劾查災開賑遲緩之縣令二人以儆其餘逾年因病自乞京職歷署吏部侍郎工部尙書八年授兩江總督劾按察使朱隆阿喜事株累士民多怨調朱隆阿內用江蘇昭文浮收漕糧江西樂平勒折重徵縣民並走訴於京先後下大文鞠實劾府縣官視職究治詔嘉大文秉公不徇庇屬員使小民含冤得白奸胥猾吏不致倖逃法網訓責各督撫力改積習九年召授左都御史未至擢兵部尙書大文赴京病於途詔遣侍衛率醫往視久不痊賜尙書銜回籍旣而因在直隸失察屬吏侵挪部議革職詔俟病痊

以四品京堂用遂不出二十年卒於家

熊枚字存甯江西鉛山人乾隆三十五年舉鄉試第一次年成進士授刑部主事斷獄平左翼護軍給餉誤用白片催責私補印其長當以盜印罪枚謂知誤更正與盜用異改緩宜城縣吏毆斃社長賄改病死擬緩枚謂闕毆情輕舞文情重改實在部八年多所持議遷員外郎尙書英廉薦其才出爲甘肅平涼知府母憂去服闋補河南汝甯府汝陽有殺人獄已得實控不止枚訊鞫時忽熟視旁吏曰此汝所教也吏色變刑之則稱將嫁禍某富家咸以爲神丁生母憂代者未至米價騰長枚於喪次諭縣令治居奇者運米接濟民乃安服闋補直隸順德府擢山東泰武臨道五十八年遷江蘇按察使逮治博徒馬修章及竹堂寺僧恒一皆稔惡斂法者吳江太湖濱淫祠三郎神奸民所祀其黨結胥吏擾民枚廉知值賽祠舟集爲胆湖密捕得三十八人或以誣良訴尾其舟得盜賊并逮劇盜九人毀三郎像火之盜遂息教匪劉之協傳彌勒教入教者給命根錢安徽民任梓家供彌勒像有簿記六十人奉錢數官吏捕得指爲匪巡撫

已上聞逮至江南枚親訊六十人皆任梓戚友賀昏嫁者乃得釋六十年遷雲南布政使以治劉河工未竣留署蘇江布政使開蘇州城河集銀六萬兩擇郡紳董其役不使縣令與工事嘉慶二年調安徽尋擢刑部侍郎六年直隸大水總督姜晟以辦賑延緩免命枚署總督截留漕糧六十萬石儲天津北倉枚請分儲鄭家口泊頭諸水次便災區輓運條上賑卹事宜災戶仿保甲造冊省覆查杜刁控酌量變通賑期捐賑者分別旌賞各學貧生給口糧綠營兵丁給修房價修災縣監獄以工代賑並如議行偕侍郎那彥寶築永定河決口既而調陳大文爲總督詔枚受代後專任查賑巡閱數十州縣舉者五人劾四人王田令倪爲德清而贖枚初至怒之明日詰賑事指畫悉中即首薦上嘉枚勤事擢左都御史時有劾枚擾驛需索供應者命陳大文察訪自其誣且言枚盡心賑務特詔褒之七年回京典會試復署直隸總督授刑部尚書調左都御史管理三庫十年授工部尚書復命署直隸總督率布政使裴行簡清查虧空部議各省販鐵官爲定額疏上枚面陳鐵爲民間日用所需不能預定多寡官爲查辦

恐滋流弊上諭其說而斥枚隨同畫諾召對忽有異詞年老重聽不宜部務復調左都御史未幾有山東民婦京控應奏枚意未決副都御史陳嗣龍劾枚模稜且言枚聲名平常詔斥嗣龍見枚左遷揣測妄劾終以枚不能和衷鑄級留任直隸藩司書吏僞印虛收庫銀事覺坐失察議褫職詔以四品京堂用補順天府丞次年充鄉試提調官冊券遲誤降五品職銜休致十三年卒

裘行簡字敬之江西新建人尙書曰修子乾隆四十年賜舉人授內閣中書充軍機章京遷侍讀四十九年從大學士阿桂勦甘肅石峰堡回匪復從察治河南睢州河工五十年出爲山西甯武知府調平陽因親老自請改京秩補戶部員外郎仍直軍機累遷太僕寺少卿嘉慶六年命赴陝西犒軍時經略額勒登保駐略陽行簡疏言川陝兵宜扼衝嚴守使陝匪不入川川匪不入陝然後逼使東竄經略以大兵蹙之可計日梟縛又言自寶雞至褒城棧道卡兵宜復設且於要害設大營隔賊路通糧運又以額勒登保方引嫌自請舉劾止及於麾下行簡疏請五路將士皆聽舉劾移書川督勒保陳廉閔相下之義兩帥大和

途次進太僕寺卿賜花翎尋出爲河南布政使丁母憂服闋補福建布政使自乾隆末授受禮成恩免廢員各州縣錢穀出入益滋糾葛行簡說事清帑司冊目十有一創增子目支解毫黍皆見吏不能欺九年入覲會仁宗欲清釐直隸倉庫嘉其成效特以調任行簡澈底清覈逐條覆奏略曰直隸州縣動以皇差爲名藉口賠累自乾隆十五年至三十年四舉南巡兩幸五臺六次差務何以並無虧空四十五年至五十七年兩舉南巡三幸五臺差務較少而虧空日增由於地方大吏貪黷營私結交餽送非差務之踵事增華實上司之借端需索近年一不加察任其藉詞影射相習成風試令州縣捫心自問其捐官肥己之錢究從何處此臣不敢代爲寬解者也分年彌補則有二難直隸驛務繁多所有優缺祇可調劑銜途又別無陋規可提此爲難一也現任虧空革留勒限彼必愛惜官職實田實產亦思全完若責以代前任按年彌補焉背解囊勢必取給倉庫前欠未清後虧復至此爲難二也州縣虧項無著例應道府分賠道府賠項無著例應院司攤賠今直隸未申明定例請於兩次清查應行監追者再

限一年如財產實屬盡絕著落上司分別賠繳嘉慶十年以後交代虧缺惟有執法從事不得混入清查致有寬縱疏入上嘉其明晰下部議行尋命以兵部侍郎銜署直隸總督十一年察出藩司書吏假印虛收解款二十八萬有奇遣使按訊歷任總督布政使議譴有差行簡任內虛收之數少詔以事由行簡立法清查始得發覺寬之是年秋赴永定河勘工途次感疾卒上深惜之優詔賜卹依一品例諡恭勤賜子元善舉人

方維甸字南耦安徽桐城人總督觀承子觀承年逾六十始生維甸高宗命抱至御前解佩褰賜之乾隆四十一年帝巡幸山東維甸以貢生迎駕授內閣中書充軍機章京四十六年成進士授吏部主事歷郎中五十二年從福康安征台灣賜花翎遷御史累擢太常寺少卿又從福康安征廓爾喀歷光祿寺卿太常寺卿授長蘆鹽政嘉慶元年坐事奪職吏議遣戍軍台詔寬免降刑部員外郎仍直軍機遷內閣侍讀學士從尙書那彥成治陝西軍務五年授山東按察使遷河南布政使時川楚教匪未靖維甸率兵六千防守江岸疏言大功將蒞

裁撤鄉勇最爲要務宜在撤兵之前預爲籌議俟陝西餘匪殄盡酌移河南防兵以易勇可節省勇糧上題之八年調陝西就擢巡撫督捕南山客匪籌撤鄉勇嚴治糧餉並協機宜復賜花翎十一年甯陝新兵叛維甸亟令總兵楊芳馳回偕提督楊遇春進山督剿會德楞額奏奉命視師賊竄兩河將趨石泉維甸遣總兵王兆夢擊之勸民修寨自衛賊無所掠未幾叛兵乞降德楞額奏請以蒲大芳等二百餘人仍歸原伍上責其寬縱命維甸按治疏陳善後六事如議行十四年擢閩浙總督蔡牽甫殲朱渥乞降遣散餘衆臺灣嘉義彰化二縣械鬪命往按治獲犯林聰等論如律疏言臺灣屯務廢弛派員查勘恤番丁苦累申明班兵舊制及歸併營汛地以便操防約束臺民械鬪設約長族長令管本莊本族嚴禁隸役黨護把持又商船貿易口岸牌照不符定三口通行章程杜丁役勾串舞弊詔皆允行以臺俗民悍命總督將軍每二年親赴巡查一次著爲例十五年入覲以母老乞終養允之會浙江巡撫蔣攸銑疏劾鹽政弊混命維甸按治明年召授軍機大臣維甸疏陳母病請寢前命允其留籍侍養十八年丁

母憂遣江甯將軍奕劻未幾教匪林清謀逆李文成據滑縣奪情起署直隸總督維甸自請馳赴軍營勦賊會邢彥成督師奏捷允維甸回籍守制二十年卒於家上以維甸忠誠清慎深惜之贈太子少保諡勤襄賜其子傳穆進士

董教增字益甫江蘇上元人乾隆四十五年南巡召試舉人內閣中書五十一年成一甲三名進士授編修散館改吏部主事累遷郎中嘉慶四年以道員發四川明年授按察使戡眉雷波二廳銅鉛各廠毘連夷地姦民與爭界焚夷巢獮夷糾涼山生番爲變教增率兵往議者多主勦教增不可廉得漢姦構釁者十一人夷匪首事者六人集衆誅之夷情帖然仁宗以教增不煩兵力而遠夷心服諭獎有加尋調貴州九年遷四川布政使十二年擢安徽巡撫甯國池州廣德各屬舊有棚民植雜糧爲業戶部慮妨民田議遣回籍教增言棚民既立室家難復遷徙且所種多隙壤於民田無損於民食有益第約束之而已從之又言徽甯等府巨室向有世僕出戶已久告訐頻仍請嚴杜妄訟凡世僕以見在是否服役爲斷其出戶及百年者雖有據亦開豁爲良得旨允行著爲例十

五年調陝西興安七屬舊食河東引鹽乾隆間課攤地丁其後復歸商運地介川楚土鹽侵礙運艱費重引課多虧教增請循鳳翔例改食花馬池鹽引歸民運課按丁攤以恤商力又榆林綏德吳堡米脂四州縣向食土鹽官給票銷售前撫方維甸請用部引以二百斤爲率凡萬一千三百餘引民力難勝教增規復其舊由州縣頒發小票每票五十斤民皆便之時南山善後倚漢中知府嚴如煜能盡其才不拘文法歲歉請賑逾限破例上陳得允十八年調廣東先是百齡銳意滅海寇曾貽教增詩云嶺南一事君堪羨殺賊歸來啖荔支旣而張保仔就撫教增報書曰詩應改一字爲降賊歸來也百齡媿之至是承其後諸降人桀驁爲閭閻害懲治甚力然未嘗妄殺廣州府有死囚值赦減等改軍而逃獲之論重辟按察使持之堅教增以律不當死斷斷與辯此囚卒免死二十二年擢閩浙總督先是海寇未平禁商民造船高不得逾一丈八尺小不任重載難涉風濤沿海多失業教增以寇平已久請免立禁限以從民便允之福清武生林彌高者健訟包糧阻衆不納邑令躬緝爲其黨邀奪官役並傷令文武

往捕獲彌高嗾其黨劫持通縣抗徵教增親鞫得彌高罪狀立斬以徇諸郡惴懼強宗悍族抗欠者皆輸納如額奏入詔嘉其能臨海民糾衆毆差致釀大獄巡撫楊體坐褫職命教增兼權浙撫鞫治之漳泉兩郡多械鬪殺人官吏往往不能制龍溪令姚瑩捕渠魁五人杖斃之巡撫疑其違制教增曰刑亂國宜用重典俊容之悍俗稍戢張保仔就撫後改名寶官至澎湖副將時論猶指斥教增責令捕盜奔走海上盜平而寶亦死二十五年入覲乞病未允道光元年乃得請歸二年卒賜卹諡文恪教增有識量彊毅不阿官四川時力矯豪奢崇節儉宴集不設劇總督勒保以春酒召聞樂而返亟撤樂乃至盡歡嘗言刻於己爲儉儉於人爲刻時歎爲名言

論曰吳熊光忠謹任重有大臣風汪志伊陳大文矜尙廉厲或矯或偏枚熊勤於民事晚誚模稜名位雖皆不終要爲當時佼佼裘行簡方維甸名父之子特被恩知董教增有爲有守建樹閔達蓋無間然

清史稿

列傳一百四十五

馮光熊

陸有仁

覺羅琅玕

烏大經

清安泰

常明

溫承惠

顏檢

馮光熊字太占浙江嘉興人乾隆十二年舉人考授中書充軍機章京累擢戶部郎中三十二年從明瑞赴雲南授鹽驛道母憂歸坐失察屬吏科派奪職服闋以員外郎起用仍官戶部直軍機遷郎中從尙書福隆安赴金川軍授廣西右江道署按察使兼鹽驛道歷江西按察使甘肅布政使四十九年石峰堡回民作亂籌畫戰守儲設饑需具備以前江西巡撫郝碩迫索屬吏事覺同官多獲譴光熊亦緣坐奪官留營効力事平用福康安薦起爲安徽按察使洊擢湖南巡撫調山西時議河東鹽課改歸地丁光熊疏言河東鹽行山陝河南三省商力積疲易商加價俱無所濟若課歸地丁聽民販運無官課雜費兵役盤詰

關津留難較爲便宜山西州縣半領引行鹽半食土鹽蒙古鹽仍納引稅其間或引多而地丁少或引少而地丁多徵之三省皆然請將課額四十八萬餘兩通計均攤允之五十七年上幸五臺各疆吏先後奏陳自鹽課改革後價頓減落民便安之詔嘉光熊調劑得宜賜花翎黃馬褂署工部侍郎未幾授貴州巡撫調雲南五十九年署雲南總督明年大塘苗石柳鄧叛擾銅仁光熊赴松桃防禦以思州田壩坪鎮遠四十八溪思南大坪密邇楚苗且扼銅仁後路分兵屯守苗匪急攻松桃正大不得逞旋赴銅仁治餉需偕總督福康安治軍設防規畫稱旨命留貴州巡撫任嘉慶二年事平奏請銅仁正大改建石城以資捍衛從之會狃苗又起偕總督勒保督率鎮將聯合滇黔楚粵諸軍勦撫事具勒保傳光熊分檄將吏解歸化廳圍肅清播東播西兩路降安順廣順所屬苗寨狃苗平偕勒保奏上善後四事請隨征武舉武生及鄉勇就近補充弁兵餘丁給難民棲止牛具費用儲糧備兵民就食清釐田畝靖苗漢之爭自軍興以來凡所措置多邀嘉許勒保移師入川善後專任光熊三年春復疏請申禁漢民

典賣苗田及重債盤剝驅役苗佃禁客民差役居攝苗寨酌裁把事土舍亭長定夫徭工價以利窮苗酌設苗弁以資管束悉報可五年詔光熊治理有聲年近八旬召授兵部侍郎尋擢左都御史六年卒上念前勞賜祭一壇

陸有仁浙江錢塘人乾隆三十四年進士授刑部主事累遷郎中四十六年出爲廣西梧州知府調太平五十二年安南內訌夷眷來奔有仁處置得宜會擢福建延建邵道總督孫士毅請留防邊尋調督糧道歷山東按察使直隸布政使五十七年坐在山東讞獄草率降甘肅按察使嘉慶元年擢刑部侍郎留治甘肅賑務宜縣赴陝勦教匪命攝陝甘總督二年匪由河南竄朱陽關逼雒南疏請借西甯鎮總兵富爾賽馳赴潼商又調甘涼鎮兵會勦詔軍務責巡撫有仁應駐甘肅親身赴陝跡涉張皇命回蘭州停止所調鎮兵時宜縣檄調撤拉爾回兵二千赴興安有仁并令暫停上以漢中兵單待回兵截勦乃教匪竄漢陰而回兵尙滯循化斥有仁一經申飭于應援之兵亦屢催罔顧詔褫職鞫訊尋原之發四川効力授陝西按察使遷布政使三年襄陽賊高均德犯陝西叙

防堵功賜花翎四年擢廣東巡撫五年召爲工部侍郎調刑部授陝西巡撫先是那彥成在陝勸民築寨堡計藍田鄠鄠寶雞商州鎮安商南孝義五郎共五百四十一處台布爲巡撫復議漢中二棧爲軍餉要道於寶雞鳳縣留壩褒城甯羌各驛築堡以周三里爲度徙民屯糧至是尙未盡實行嚴詔切責有仁疏言川陝情形不同四川地居天險如大成寨大團包方山坪等寨每處可容數萬人小者亦數千人賊據之可抗官兵民守之亦可拒賊如南山內層巒疊嶂無寬敞環抱之所止能於陡險山巔就勢結構每寨止容數百人至千餘人蜀山多膏腴稻田民居稠密其勢易合陝西老林惟棚民流寓零星墾種隔十里數十里始有民居十數戶若糾合數村共築一堡則南村之人欲近南北村之人欲近北惟秦隴以西人皆土著無不踴躍興工秋間賊入西棧每約彼此各不相犯而寨民必乘間截其尾隊奪其牲畜不使晏然空過其西安同州鳳翔三府與漢南附近川省之區皆多土著寨利害每邑結有堡寨或百餘或數百其漢北山內近亦一律興工又恐結寨後民丁但知守寨而於賊出入要隘轉

無堵禦復令於寨堡之外每寨撥數百數十人合力守卡以杜窺伺請分區責成各道刻期完竣疏入報聞有仁與額勒登保規畫築堡團練著有成效撫輯難民無歸者以安康白河等處叛產及南山客民荒田量給安插六年分撥兵勇防守總要隘口奏請於五郎孝義等處專派大員團練堵剿以專責成川匪逼黑河道總兵齊耶阿通判維昂截擊餘匪東竄牛尾河副將韓自昌殲之被優叙有仁治陝三年經理饒需先事綢繆撙節不濫撥捕餘匪甚力屢詔褒嘉七年卒優卹官其子繼祖主事

覺羅琅玕隸正藍旗捐納筆帖式累遷刑部郎中起擢內閣學士出爲江蘇按察使乾隆五十年召授刑部侍郎逾年授浙江巡撫五十二年大兵勦臺灣林爽文琅玕儲穀二十萬石於乍浦甯波溫州由海道輸運高宗嘉之坐審擬海盜失當吏議當革職詔寬免自請罰銀三萬兩嘉善縣吏浮收按問得實上以浙漕積弊琅玕不勝任命解職予頭等侍衛赴哈密辦事五十六年坐監修浙江海塘工程損壞琅玕在任未親勘詔責賠修應銀二十二萬七千有奇免其

半歷葉爾羌辦事大臣喀什噶爾參贊大臣坐家人販玉解任回京尋予郎中銜爲熱河避暑山莊總管嘉慶二年以三等侍衛充古城領隊大臣召授刑部侍郎五年授貴州巡撫勦禽廣順等寨苗楊文泰等詔嘉獎加總督銜未幾就擢雲貴總督六年貴州石覲苗叛巡撫伊桑阿赴銅仁勦治未即平詔琅玕往督師而調伊桑阿雲南伊桑阿因按察使常明攻克石覲有所禽獲遂謫奏親往督戰苗皆歸伏軍事已竣及琅玕至難民擁道訴其誣遂督兵進勦攻克上潮下潮諸寨始肅清會初彭齡劾伊桑阿貪劣下琅玕鞫實上尤罪其欺罔誅之詔斥琅玕於伊桑阿未親往石覲避嫌瞻徇降二品頂帶七年維西夷恒乍綑與其黨腊者布作亂禿樹出亨附之琅玕率總兵張玉龍入山勦捕克阿喃多賊寨進攻諸別古山獲禿樹玉龍克小維西夷人縛腊者布獻軍前磔之進攻康普恒乍綑遁瀾滄江外獲其孥分兵攻吉尾樹苗琅玕駐劍川斷賊後路敗之於通甸小川克迴龍廠尋圍勦上江山箐賊殲其渠餘衆乞降琅玕以恒乍綑勢蹙疏請撤兵提督烏大經率兵二千駐防賊調官軍已退乘水洞潛渡

糾江內降猓復肆劫掠琅玕馳抵劍川恒乍綑遁走八年上以首逆未獲命永保接辦軍務琅玕已禽斬漢奸張有斌臨江紮筏聲言渡兵江外猓猓震悚詣軍門乞降琅玕令誘導諸寨禽賊自效九月恒乍綑潛匿山箐官軍搜獲之餘黨盡殲事平予議叙琅玕以維西僻處邊隅各夷雜居江內外稽察難周疏請於維西麗江等五路設頭人給頂帶約束夷衆又以維西南北路及鶴麗鎮劍川諸汛皆要地請裁馬爲步添兵八百分布要隘邊境遂安九年卒諡恪勤烏大經陝西長安人由武進士授三等侍衛出爲山東德州營參將三十九年王倫倡亂大經助守臨清力戰保危城功最多高宗特獎之立擢臨清副將歷江西南贛鎮貴州古州鎮總兵廣西提督調雲南五十三年冬率雲南兵從孫士毅征安南至則士毅已克其都城明年春大軍爲阮惠所襲敗績大經所部得嚮導全師而返尋母憂去職起爲甘肅提督復調雲南嘉慶四年僧銅金與孟速土司構難勾結野猓蔓延猛猛及緬甯內地大經偕總兵蘇爾相進勦克緬屬南柯三節石昔木腊南那招霧籠上中下霽安腊東困賽等地破南泗河賊

卡肅清緬邊署按察使屠述濂由猛猛一路會勦連克大蚌山南元寨五年春
總督書麟視師用大經計分兩路進攻猛白山箐大經由南路連戰渡黑河焚
賊寨首逆尋就禽夷衆受撫七年春入覲會維西事起命大經馳回從琅玕進
勦大經偕總兵書成先清威遠獫狁匪乃會兵維西克康普上意不欲窮兵命大
經留防及匪復肆掠進勦獨村坪及康普小維西連克之八年春與琅玕分駐
石鼓橋頭沿江督勦至十月恒乍綳就禽乃班師九年卒

清安泰費莫氏滿洲鑲黃旗人乾隆四十六年進士授刑部主事擢員外郎出
爲甘肅涼州知府調署蘭州擢湖南衡永桂郴道六十年苗疆事起奉檄赴保
靖撫輯降苗以治餉功賜花翎嘉慶元年械送首逆吳半生石三保至京擢按
察使遷廣西布政使七年署巡撫八年調浙江布政使十年擢江西巡撫調浙
江十一年海寇蔡牽犯浙洋赴溫台防勦嚴杜接濟賊樵汲俱窮竄去詔褒之
總督阿林保劾提督李長庚因循玩寇下清安泰密察疏言長庚忠勇冠諸將
身先士卒屢冒危險爲賊所畏惟海艘越兩三旬若不燂洗則苦黏盤結駕駛

不窺其收港非逗留且海中勦賊全憑風力風勢不順雖隔數十里猶數千里
旬日尙不能到是故海上之兵無風不戰大風不戰大雨不戰逆風逆潮不戰
陰雲蒙霧不戰日晚夜黑不戰颶期將至沙路不熟賊衆我寡前無泊地皆不
戰及其戰也勇力無所施全以大礮轟擊船身簸蕩中者幾何我順風而逐賊
亦順風而逃無伏可設無險可扼必以鈎鏢去其皮網以大礮壞其舵身蓬胎
使船傷行遲我師環而攻之賊窮投海然後獲其一二船而餘船已飄然遠矣
賊往來三省數千里皆沿海內洋其外洋瀾瀾則無船可掠無憑可依從不敢
往惟遇勦急時始間爲逋逃之地倘日色西沉賊直竄外洋我師冒險無益勢
必迴帆收港而賊又追誅矣且船在大海之中浪起如升天落如墜地一物不
固即有覆溺之虞每遇大風一舟折舵全軍失色雖賊在垂獲亦必舍而收泊
易桅竣工賊已遠遁數日追及桅壞復然故常屢月不獲一戰夫船者官兵之
城郭營壘車馬也船誠得力以戰則勇以守則固以追則速以衝則堅今浙省
兵船皆長庚督造頗能如式惟兵船有定制而閩省商船無定制一報被劫則

商船卽爲賊船愈高大多礮多糧則愈足資寇近日長庚勦賊使諸鎮之兵隔斷賊黨之船但以隔斷爲功不以禽獲爲功而長庚自以己兵專注蔡逆坐船圍攻賊行與行賊止與止無如賊船愈大礮愈多是以兵士明知盜船貨財充積而不能爲禽賊禽王之計且水陸兵餉例止發三月海洋路遠往反稽時而事機之來間不容髮遲之一日雖勞費經年不足追其前效此皆已往之積弊也非盡矯從前之失不能收將來之效非使賊盡失其所長亦無由攻其所短則岸奸濟賊之禁必宜兩省合力乃可期效奏上詔嘉其公正由是益嚮用長庚清安泰之力也尋又條上防海事宜沿海居民編造保甲稽覈商販以斷米糧出口禁製火爆防火藥透漏斷絕採捕以杜奸宄溷迹並如議行十二年冬蔡牽子至普陀寺未獲被譴責尋以阮元代之調河南巡撫十四年卒

常明佟佳氏滿洲鎮紅旗人由筆帖式授步軍統領主事出爲湖南桂陽知州擢雲南曲靖知府乾隆六十年從總督福康安征苗疆率兵屢克賊巢賜花翎鎮筸苗吳半生據蘇麻寨自構皮寨進擊敗之復破西梁賊砦擄貴州貴東道

掩擊半生於板登寨獲其弟吳老正等半生復來犯設伏大破之乘勝奪賊卡五尋由西梁進攻燬其寨賊糾旁柳苗爲援熾戮甚衆乞降拒不受復大挫之擢按察使賜號智勇巴圖魯詔以苗匪每遇敗乞降叵測難信飭各路將領以常明爲法進剿老烏廠斬賊目隴老香與總兵珠隆阿合剿大烏草河逆西苗連克魚井豆田三十餘寨會大軍於古丈坪半生適至常明冒雨進攻殲賊千餘分兵克烏龍岩茶它山諸寨卡進圍高多寨半生降乘銳克鴨保寨嘉慶元年勦下平隴苗於葫蘆坪毋憂留營偕副將海格破小竹山賊於墮河坡俘賊目楊通等上嘉常明奮勉仍命署按察使二年春貴州狝苗起從總督勒保討之與施紹並爲軍鋒同破賊關嶺復夾攻連拔賊寨八解新城圍再敗之望城坡賊匿岩洞以拒設伏斃賊千餘環攻於卡子河賊大潰解南籠圍加布政使銜時黃草壩被圍久滇黔道梗常明援之克九頭山獲僞將軍陸寶貴燬馬鞭田賊柵俘李阿六等連戰皆捷圍乃解尋克馬鞍山繞擊洞洒賊巢連攻三晝夜禽賊酋吳抱仙於三隴口授布政使進克安有山擒當丈賊巢獲逆首章七

緒鬚又擒賊目黃阿金梁國珍等於補納山三年連拔兩薛巖等十八寨苗境悉平服闋始莅布政使任是年冬署巡撫疏薦總兵施縉率貴州兵赴四川剿教匪五年因縉戰歿貴州兵不能救常明坐視翎頂秋入覲詔念前勞予三品頂帶留巡撫署任題銷軍需詔詰貴陽賊蹤未至募鄉勇多至五萬餘名用銀十九萬餘兩命總督琅玕察覈尋奏常明雖無冒帑處置失宜責賠繳賞值銀九萬餘兩六年石覲苗與湖南苗勾結爲亂巡撫伊桑阿檄常明率師攻克之復原銜花翎尋授巡撫七年以挪川鉛廠帑銀及失察幕僚私售鉛丸抽匿案卷事覈職籍沒家產旣而予藍翎侍衛充伊犁領隊大臣調庫車辦事大臣十年授湖北鹽法道累遷湖北巡撫上念常明久於軍事以四川民夷雜處控制不易十五年特擢爲總督詔勉其盡職減免賠項銀萬五千兩甯遠府屬夷地多募漢人充佃自教匪之亂川民避入者增至數十萬人爭端漸起十七年常明疏請漢民移居夷地及佃種者編查入冊不追旣往此後嚴禁夷人招佃與漢民轉佃並編保甲以資約束增文員以便彈壓移營汛以利控制報可又請

川省鹽課改歸地丁聽民興販詔斥其妨礙准綱不顧隣省利害降二級留任十八年署成都將軍二十年中瞻對番酋洛布七力爲亂偕提督多隆阿總兵羅思舉往勦自裏塘進攻破之擣熱籠賊巢洛布七力舉家焚斃詔以未生得逆首不予議叙二十一年成都革兵謀變悉捕之置於法詔嘉其鎮靜二十二年甯越夷擾邊道將平之尋卒贈太子少保優卹諡襄恪

溫承惠字景僑山西太谷人乾隆四十二年拔貢朝考首擢除七品小京官分吏部拔貢內用自是始累遷郎中五十四年出爲陝西督糧道母憂歸高宗巡幸五臺迎鑾召對嘉其才服闋補延榆綏道嘉慶元年川陝楚軍事急承惠奉檄治興安漢中團防遭父憂留軍仍攝道事賊犯平利承惠馳勦山水猝漲墜水遇救得免趨扼險隘獲捷服闋命以按察使銜仍補原官五年擢陝西按察使疏言賊擾陝境已歷數年兵爲牽綴連饟往往不及則駐兵以待賊得乘間遠逸三省邊境綿長宜扼要駐兵以逸待勞上睦之殲匪首王金柱於安康復破賊洵陽賑撫流亡民心漸定邊布政使仍留防賊屢犯境輒擊却之守禦興

漢先後凡六年事定優叙八年調河南修伊洛舊渠十年擢江西巡撫十一年調福建兼署總督海寇蔡牽犯臺灣鹿耳門檄總兵許松年赴海壇竿塘與提督李長庚會剿三沙爲蔡牽鄉里增兵駐守禁沿海接濟詔嘉之尋調署直隸總督十二年上閱古北口兵獎其嫻整命實授溶黑龍溫榆北運遼陽諸河十三年上幸天津賞黃馬褂尋以巡幸點景科派爲肥鄉令所揭褫花翎黃馬褂旋復之十七年正月以歲除得雪加太子少保鉅鹿縣民孫維儉等傳習大乘教灤州民董懷信傳習金丹八卦教先後發覺失察輕縱褫官銜花翎黃馬褂革職留任復以他事數被譴責十八年河南滑縣教匪起命偕提督馬瑜往勦數戰滑縣近地破賊于道口尋命陝甘總督那彥成總統軍務承惠爲參贊時匪首林清在京師起事擾及宮禁詔以林清傳教八年承惠不能先事查緝及勦匪逗留罪褫職留治糧餉十九年命以員外郎赴河南睢工效力工竣遷郎中隨尙書戴均元襄理永定河工二十三年授山東按察使承惠前官畿輔不孚衆望及復起頗思晚蓋山東故多盜偵知東平人廣平知府王兆奎三世窩

盜密捕治之期年積案一清拏擊貪酷蘇困起敝吏治爲之一變特詔褒獎然卒不安其位先是盜夜劫泰安富民徐文誥家戕其傭柏永柱縣以誤殺爲文誥罪質疑獄也按察使程國仁入其言鍛鍊定讞承惠至固疑不實於他獄盜供得其情銳意平反巡撫和舜武惑於浮言尼之及偵獲盜首王壯於吉林具承槍殺永柱狀時國仁已擢巡撫舊與承惠有嫌且護前不欲承惠竟是獄檄勘隄工承惠辭乃劾承惠自以曾官總督橫肆不受節制礙職薦前兗沂道童槐繼爲按察使槐復劾承惠濫禁無辜以罪人充捕擾民譴戍伊犁其去也國仁送於候館居民洶洶習之不及送而歸旣而文誥訴於京命尙書文孚往鞠未至槐倉卒定讞釋文誥二十五年起承惠爲湖北布政使逾年以衰老降戶部郎中尋引疾歸卒於家

顏檢字惺甫廣東連平人巡撫希深子拔貢乾隆四十二年授禮部七品小京官洊升郎中五十八年出爲江西吉安知府擢雲南鹽法道調迤南嘉慶二年勦威遠獠匪禽匪首札秋擢江西按察使歷河南直隸布政使五年護直隸總

督東明縣民李車因姦砍傷七歲幼童從重擬絞決永年縣民梁自新勒斃繼妻及媳訊因繼妻虐待前妻子有幅縱媳與人通姦同謀毒斃有幅自新忿將妻媳致死從輕擬杖流兩獄並爲仁宗嘉許特旨依議梁自新加恩再減杖徒先是直隸回贖旗地租銀積欠至十三萬兩前總督胡季堂汪承霈屢議開劑未有善策檢疏請復旗租原額以紓民力積欠得全減免焉六年擢河南巡撫七年詔檢前護直督有治績命以兵部侍郎銜署理直隸總督尋實授賜黃馬褂九年京察予議叙檢歷官畿輔頗爲仁宗所信任尋以束鹿縣民王洪中與張父觀鬪毆被傷上控承審官偏聽王洪中受責自縊獄經部鞫詔斥檢玩視重案下部議革職改留任又因他獄屢被詰責檢具疏陳謝諭曰方今中外吏治貪墨者少疲玩者多因循觀望大臣不肯實心惟恐朕斥其專擅小官從而效尤僅知自保身家此實國家之隱憂不可不加整頓卿係朕腹心之臣其勉之十年坐易州知州陳漢虧空踰十萬查辦不力降調革任予主事銜効力吉地工程處會永定河隄壞責隨築賠修又以刑部秋審直隸省由緩改實者十

四起革主事銜仍留工次事竣予五品銜發南河委用未幾復因直隸官吏勾通侵帑事覺革職遣戍烏魯木齊十三年釋回十四年命以主事充西倉及大通橋監督十五年授湖南岳常澧道遷雲南按察使十六年擢貴州巡撫尋召來京坐前在直隸失察灤州民董懷信等傳習邪教降二級以京員川又坐涿州知州徐用交代朦混降補工部郎中十九年授山東鹽運使命以三品頂戴爲浙江巡撫奏濬西湖興水利上素稱檢操守才幹而病其不能猛以濟寬屢加訓戒二十年武平民劉奎養聽糾入派弟會傳習徒衆論斬詔斥檢未究編造逆書之人下部議復因西湖厝棺被盜言官劾其謙擬輕縱命侍郎成格等往按坐正犯由賄屬誣認詔切責褫職二十四年祝嘏予官補刑部員外郎逾年授福建巡撫道光元年疏陳歲進荔支樹素心蘭採運艱難詔永遠停貢並嘉檢之直二年復擢直隸總督先是藩司屠之申奏請直隸差徭每地一畝攤徵銀一分以示公平詔俟檢到任定議檢力言其不可行請仍舊制三年以年老內召授戶部侍郎調倉場復出爲漕運總督五年坐河淤滯運降三品銜休

致尋復以疏請截留漕糧忤旨降五品銜十二年卒

論曰馮光熊治苗疆善後陸有仁興陝境寨堡團練琅玕定石蜩苗維西夷清
安泰保全良將李長庚常明佐勒保平神苗晚任蜀疆鎮撫番夷皆一時疆臣
之能舉其職者溫承惠治畿輔無異績陳臬山東則治盜清獄有聲卒以平反
冤獄遭傾陷可謂能晚蓋矣顏檢明於吏事治尙安靜而屢以寬縱獲譴焉

清史稿

列傳一百四十六

岳起

荆道乾

謝啟昆

李殿圖

張師誠

王紹蘭

李奕疇

錢楷

和舜武

岳起鄂濟氏滿洲鑲白旗人乾隆三十六年舉人議叙筆帖式累擢戶部員外郎翰林院侍講學士詹事府少詹事五十六年遷奉天府尹前官貪黷岳起至屋宇器用徧洗滌之曰勿染其污迹也與將軍忤逾年擢內閣學士尋出爲江西布政使殫心民事值水灾行勘圩隄落水致疾詔嘉其勤許解任養病嘉慶四年特起授山東布政使未幾擢江蘇巡撫清介自矢僮僕僅數人出屏窮從禁遊船聲伎無事不許讌賓演劇吳下奢俗爲之一變疏陳漕弊略曰京漕積習相因惟弊是營米數之盈絀米色之純雜竟置不問旗丁領運無處不以米爲挾制即無處不以賄爲通融推原其故沿途之抑勒由旗丁之有幫費旗丁

之索幫費由州縣之浮收除弊當絕其源嚴禁浮收實絕弊源之首請下有漕
各省列欸指明嚴行禁革俾旗丁及漕運倉場無從更生觀望冀倖之心詔嘉
其實心除弊常州知府胡觀瀾結交鹽政徵瑞長隨高柏林派捐修葺江陰廣
福寺岳起疏言觀瀾柏林雖罷逐尙不足服衆心請將錢二萬餘串責二人分
償以修蘇州官塘橋路丹徒知縣黎誕登諷士紳贖其政績保留實不職劾罷
之五年署兩江總督劾南河工員莊剛劉晉等侵漁舞弊莫溲於任所設店肆
運貨至工居奇網利並治如律揚州關溢額稅銀不入私盡以報解覈減兩藩
司耗羨開欸實存銀數報部並下部議行六年疏請濬築毛城鋪以下河道隄
岸上游永城洪河下游蕭碭境內河堰並借帑舉工分五年計畝徵還允之八
年入覲以疾留京署禮部侍郎會孝淑皇后奉移山陵坐會疏措語不經革職
留任尋命解署職遂卒帝深惜之贈太子少保賜卹如例無子詔問其家產僅
屋四間田七十六畝故事旗員歿無嗣者產入官以岳起家清貧留贍其妻妻
歿官爲管業以爲祭掃修墳之資異數也妻亦嚴正岳起爲巡撫時一日親往

籍畢沅家暮歸飲酒微醺妻正色曰畢公耽於酒色不保其家君方畏戒之不暇乃復效彼耶岳起謝之及至京居無邸舍病歿於僧寺妻紡績以終吳民尤思其德呼曰岳青天演爲歌謠謂可繼湯斌云

荆道乾字健中山西臨晉人乾隆二十四年舉人大挑知縣官湖南歷麻陽龍山東安永順慈利靖州所至有惠政屏陋規平冤獄在靖州賑飢尤多全活屢膺上考四十七年遷甘肅甯夏同知入覲大學士劉墉曾官湖南巡撫稱之曰第一清官也名始著尋署石峯堡同知時方用兵治事不廢修復水利復薦卓異記名五十四年擢安徽池州知府屢署徽甯池太道筦蕪湖關贏餘不入己以充賑恤調安慶朱珪爲巡撫尤信任之疏薦擢山東登萊青道攝布政使以激濁揚清爲己任薦廉吏崔映淮李如珩等而劾不飭者嘉慶二年遷按察使四年遷江蘇布政使先是州縣存留俸薪役食及驛站經費改解藩庫俟奏銷後請支始則防吏侵挪久之解有浮費發有短平或勒抵前官虧空佐雜教官不能得俸驛傳領於臬司或苛駁案牘因索餽遺郵政日弛廢道乾入覲時面

陳其弊請悉依定章於州縣徵收時開支省解領之繁仁宗俞可至是疏上施行天下便之上方欲整飭漕政以巡撫岳起及道乾皆有清名責其肅清諸弊到官三閱月擢安徽巡撫疏請禁徵漕浮收舊耗米一斗給運丁五升加給二升運丁所得有據可考其所用沿途浮費採訪知之應禁革詔下所奏於有漕各省永禁又言屯田所以贍運每丁派田若干及應得租籽新倉旗丁不能瞭然令糧道刊刻木榜俾僉丁認田收租運船領欸刻易知單山丁正身親領以杜包領欺壓之弊田冊歸糧道收管另造副冊發各衛以備查驗並允行宿州靈璧泗州水災道乾親往監視賑廠六年以病乞罷詔許解任調理俟病痊來京候簡次年三月詔詢道乾病狀已先卒於安慶帝悼惜賜祭賜其孫敘舉人道乾由監司不三年擢至巡撫求治益急不避嫌怨自處刻苦臨歿呼舊僚至寢所指床下金示之曰吾受重恩積養廉數千兩足以歸喪諸君素愛我勿爲歛賻又呼其兄曰兄仁弱勿聽人聳而受賄違吾意兄如其言

謝啟昆字蘊山江西南康人乾隆二十六年進士朝考第一選庶吉士授編修

典河南鄉試分校禮闈均得士三十七年出爲江蘇鎮江知府調揚州明於吏事所持堅正上官異意不爲奪治東臺徐述夔詩詞悖逆獄遲緩褫職戍軍臺尋捐復原官留江南父憂奪情署安徽甯國知府復遭母憂服闋稱病久不出五十五年特擢江南河庫道遷浙江按察使六十年遷山西布政使州縣倉庫積虧八十餘萬不一歲悉補完高宗異其才以浙江財賦地虧尤多特調任歷三歲亦彌補十之五嘉慶四年擢廣西巡撫上疏略曰各省倉庫積弊有三變始則大吏貪婪者利州縣之餽賂債事者資州縣之攤賠州縣匿其私槩以公帑應之離任則虧空纍纍大吏旣餉其資助不得不抑勒後任接收此虧空之緣起也繼則大吏庸闇者任其欺蒙姑息者又懼興大獄以敢接虧空爲能員以稟揭虧空爲多事州縣且有藉多虧挾制上司升遷美缺者此虧空之濫觴也近年不職督撫相繼敗露諸大吏共相濯磨州縣亦爭先彌補但彌補之法寬則生玩胥吏因緣爲奸急則張皇百姓先受其累各省貧富不同難易迥別一法立即一弊生惟在因地制宜率定章程又多窒碍請飭下各省先查實虧

之數原虧之人如律論治其無著者詳記檔案使猾吏無可影射多分年限使後任量力補苴不必展轉株求亦不必程功且夕責成督撫裁陋規以清其源倡節儉以絕其流講求愛民之術以培元氣獎擢清廉之員以勵官常日計不足月計有餘不數年間休養生息不徒倉庫充盈吏治民生亦蒸蒸日上廣西自孫士毅經營安南軍需供億所費不貲米銀裝械毀棄關外令州縣分賠遂致通省皆虧本非州縣侵蝕且人已去任接收者正在補苴一經參追難保不勸捐派累惟率司道府省衣節食革去一切陋規俾州縣從容彌補進廉去貪無累百姓計三年之內庫項必可補足惟是數十人補之而不足一二人敗之而有餘是又在知人善任大法小廉不愛逢迎不存姑息庶不致後有續虧之患又言彌補虧空初不爲一身免累之計乃有實際臣前歷山西浙江皆未咨部亦未咨追原籍蓋當日之員大半死亡遺戍子孫貧乏者多咨追徒滋紛擾如數完繳者實無二三現任反置身事外廣西庫項未完者三十九州縣覈其庫數多寡分限三年按月交庫於交代時有不足者即以虧空論劾疏入仁宗

嘉納焉時詔買補倉穀取諸豐稔隣縣禁於本境採買啟昆言廣西跬步皆山轉運不減於穀價恐不肖者因採買之難或爲勒派請仍聽本境買補便詔如所議廣西土司四十有六生計日絀貸於客民輒以田產準折啟昆請禁重利盤剝違者治罪田產給還土司其無力回贖者俟收田租滿一本一利田歸原主五年爲斷其不禁客民入苗地者廉土民馴愚物產稀少藉販運以通有無也仿浙江海塘竹篴囊石之法修築興安陡河石隄以除水患河流深通舊銅船過陡河必一月至是三日而畢七年卒於官詔嘉其廉潔於所節省潯梧兩關盈餘項下賜銀三千兩治喪廣西士民請祀名宦祠啟昆少以文學名博聞強識尤善爲詩著樹經堂集西魏書小學考晚成廣西通志爲世所稱

李殿圖字桓符直隸高陽人乾隆三十一年進士選庶吉士授編修典湖南鄉試遷御史督廣西學政遷給事中四十九年甘肅回亂從阿桂福康安赴軍治糧餉臺站授鞏秦階道軍事初竣民回相讐焚掠報復訛言時起殿圖處以鎮靜叛黨緣坐婦稚量情釋宥罹害戶口隨宜賑恤流亡漸安卓泥土司與四川

松潘漳臘各番爭囑囑固山界殿圖輕騎履勘歷小洮河丈八嶺鸚哥口皆人蹟罕到羣番導行片語判決立石達魚山頂而還高宗幾餘考涇渭清濁源流命殿圖親勘自秦州溯流至烏鼠崕峒繪圖附說以進詔嘉其詳實六十年遷福建按察使嘉慶三年就遷布政使疏言乾隆中業農家必畜騾馬三四以任耕種嗣後官吏借用應差漸形滋擾應嚴行革除獄訟必速爲審結開釋無辜小民始得安業常平倉穀積久弊生民未受益官倉已受其虧無災之年不宜貸假吏役例有定額近則人思託足藉免役徭關津稅口官署長隨呼朋引類並爲奸姦宜并禁止詔下直省一體察禁閩俗售田田面田根糾纏不決蠹吏影射佃戶頑抗錢糧日多脫欠徵收不敷每以虛出通關而致虧缺殿圖奏請嚴治在任逾年庫儲大增擢安徽巡撫七年調福建有林陳藍胡諸大姓糾衆械鬪治如律治海盜三脚虎及蔡牽羽黨請祀海洋陣亡官兵緝匪死事者一體入祀從之十一年蔡牽久未平仁宗以臺灣勦捕事殷殿圖操守尙好軍務未嫻調江西巡撫尋詔斥殿圖於軍事無所陳奏又不能禁止海口偷漏水米

火藥降四五品京堂又以所屬久羈案犯以中允贊善降補尋遷翰林院侍講引病歸十七年卒光緒初閩浙總督文煜疏陳殿圖前任福建政績昭著諡文肅

張師誠字蘭渚浙江歸安人乾隆中南巡召試賜舉人授內閣中書充軍機章京遷吏部主事忤和珅緣事降中書得應會試五十五年成進士改庶吉士授編修嘉慶元年出爲山西蒲州知府歷雁平道河南江蘇按察使遷山西布政使州縣倉庫多虧師誠知清查有名無實特嚴於交代之際有虧必完在任三年庫儲充裕十一年擢江西巡撫以兼提督賜花翎遂著爲令尋調福建清治淹廢疏陳整頓積弊事宜詔嘉勉時海盜蔡牽朱清方猖獗總督王德榜弛黜去阿林保繼任復與提督李長庚不協師誠至始嚴防海口杜岸奸接濟籌備船械長庚得盡力勦捕是年冬長庚追蔡牽於粵洋以傷殞牽犯臺灣後山噶仔蘭爲生番擊退請收其地入版籍免爲賊踞十三年朱清與牽有隙獨竄閩洋總兵許松年擊斃之其弟渥勢暨思投首會道員德華由臺灣內渡遇牽黨

圍劫渥救之藉以通款尋復拒敵粵師不果降十四年阿林保調兩江師誠暫署總督聞蔡牽竄浙洋親駐廈門提督王得祿邱良功合剿毀盜舟牽墮海死朱渥尋率三千餘人歸誠赦其罪海疆以安閩人刊石烏石山以紀功海寇稽誅久由閩浙不能合力自師誠治閩而阮元復莅浙始告成功仁宗嘉其嚴斷接濟爲殄寇之本京察特予獎叙十九年調江蘇百齡爲總督諸巡撫皆承望風旨師誠獨舉其職初彭齡奉命同查虧帑意與百齡師誠不合遂劾兩人皆受魄遺而不得實詔原之會百齡窮治逆書獄閭閻悚息巡撫所主五府州得無擾川沙民有燒香傳徒者有司密捕解江甯師誠道標弁要於途交按察司依律鞠治免辜磔者數十人時以稱之二十一年父病篤不俟代回籍被嚴議褫職尋予編修服闋遷中允歷江西安徽布政使道光元年擢廣東巡撫調安徽繼母憂去官復歷山西江蘇巡撫六年召授倉場侍郎以病乞歸卒於家師誠警敏綜覈在當時疆吏中有能名治福建最著繼之者爲王紹蘭紹蘭字南陔浙江蕭山人乾隆五十八年進士授福建南屏知縣調閩縣巡撫汪志伊薦

其治行仁宗曰王紹蘭好官朕早聞其名召入見以知州用擢泉州知府漳泉兩郡多械鬪自紹蘭治泉州民俗漸馴而漳州守令以械鬪獄獲罪詔舉紹蘭以爲法擢興泉永道捕獲蔡牽養子蔡三及其黨蔡昌等予議叙遷按察使母憂去服闋起故官就遷布政使嘉慶十九年擢巡撫始終未出福建尋汪志伊來爲總督與布政使李廕芸不合因訐告受賂劾治屬吏希指羅織廕芸憤而自縊志伊獲譴紹蘭坐不能匡正牽連罷職少嗜學究經史大義去官後一意著述以許慎鄭康成爲宗於儀禮說文致力尤深著書皆可傳

李弈疇字書年河南夏邑人乾隆四十五年進士選庶吉士授檢討大考改禮部主事典貴州鄉試洊遷郎中五十七年出爲山西甯武知府調平陽有政聲歷江蘇糧道山東按察使嘉慶十一年坐巡撫保薦屬吏違例牽連被議左遷江南河庫道十三年遷安徽按察使治獄明慎多平反霍邱民范受之者贅於顧氏與妻反目外出久不歸縣令誤聽訛言謂其妻私於鄰楊三鍛鍊成獄當顧氏楊三謀殺罪其母與弟及傭工某加功實無左證五人者不勝刑皆誣服

奕疇閱供詞疑之驟詰曰爾曹言骨已被焚然尙有臟腑腸胃棄之何所因不能對惟伏地哭奕疇慨然曰是有冤使幹吏偵之至陳姓家言正月十五夜受之曾過宿而讞曰被殺在十三日乃綏繫諸囚嚴緝受之久之受之忽自歸則以負博遠避不敢使家人知所在今始聞大獄起乃歸投案也事得白奕疇故無子獄既解乃生子銘皖民間傳頌至演爲劇曲就遷布政使十八年擢浙江巡撫時近畿教匪未靖或言嚴衢兩郡匪徒傳習天罡會詔奕疇嚴治奕疇逮訊葉機姚漢楫等實止愚民相聚誦經祈福無逆跡坐罪首犯數人株連皆省釋安徽江西游民來浙租山墾種者日衆言官請禁奕疇疏陳勢難遽逐請分年遣令回籍上悟曰茲事不易言游民皆無恒產驅之此省又轉徙他省斷不能復歸鄉里命徐謀教養俾流亡者變爲土著乃得安尋授漕運總督在任五年運務無誤奕疇固長者待下寬坐濫委運弁降四級命以吏禮二部郎中用復以運弁縱容幫丁索費被劾降主事二十五年宣宗即位命奕疇以尙書守護昌陵道光二年原品休致十九年重宴鹿鳴加太子少保明年會榜重逢子

銘院適登第同與恩榮宴稱盛事焉二十四年卒年九十有一

錢楷字裴山浙江嘉興人乾隆五十四年進士遷翰林院庶吉士散館改戶部主事充軍機章京嘉慶三年典四川鄉試督廣西學政回京仍直軍機選禮部郎中調刑部甚被眷遇截取京察當外用予升銜留任十一年詔嘉楷久直勤勉以四五品京堂用歷太常寺少卿光祿寺卿十二年京師旱疏請循漢書求雨閉陽縱陰之說停止正陽門外石路工程詔修省在實政無事傳會五行罷其奏迭命往河南山西鞠獄次第奏結無枉縱授河南布政使十四年護理巡撫暫署河東河道總督擢授廣西巡撫尋調湖北十六年疏言外洋鴉片煙入中國奸商巧爲夾帶凡粵東西兩省匪類糾結多由於此以致盜風益熾請飭閩粵各關監督並近海督撫嚴督關員盤檢按律加等究辦內地貨賣一經發覺窮究買自何人來從何處不得含糊搪塞將失察偷漏監督委員及地方官一體參處務使來蹤盡絕流弊自除乃清理匪源之一端也詔下沿海督撫認真察辦授戶部侍郎兼管錢法堂事奏陳湖北地方事宜應酌劑者四端請附

近荊州糧米供支滿營兵食餘俱改歸北漕沿江契買洲地准其耕種納糧無契者作爲官地召佃承種新設提督移駐襄陽府城楚北均食淮鹽襄陽宜昌等府籌議減價下所司會議惟沿江洲地一事照行餘以窒礙置之復出署河南巡撫匪徒王勝子勾結南陽飢民滋事成大獄楷至任疏言前任巡撫恩長於南陽匪從一案前後具奏情節與原報不符辦理過當府州縣等緝犯並未廢弛平日聲名尙好現擬絞候之二十餘犯明年秋審均應情實不敢知而不言詔以句決與否臨時自有權衡非臣下所可豫定地方官咎有應得豈能開復斥楷敷陳未當近於喜事調補工部侍郎尋授安徽巡撫以歙縣監生張良璧採生斃命命楷親訊讞擬未依凌遲律失於輕比部議降一級調用改降二級留任十七年卒詔以楷直樞曹久有勞自簡封圻治理安靜母程年逾七旬嗣子尙幼深憫之特賜卹

和舜武伊拉里氏滿洲鑲藍旗人官學生考授太常寺筆帖式累遷步軍統領衙門員外郎以治獄明獲議叙遷兵部郎中兼公中佐領嘉慶十五年出爲江

蘇鹽法道累遷山東布政使整飭吏治輿論歸之二十二年擢山西巡撫調河南會布政使吳邦慶疏請於漳衡合流之處建閘壩和順武謂漳河盛漲湍悍非一閘所能禦越閘旁趨且停蓄泥沙塞衛水宣洩之路疏請罷之仍舊章每年挑濬資公河以資鹽運如所議行逾年調山東仁宗聞其前爲布政使有聲故有此授山東民俗好訟又近畿輒走訴京師和舜武再蒞訟頓減特詔褒勉疏請清理京控積案責巡撫藩臬分提鞠訊月定課程各自陳奏又請酌改竊盜窩匪條例加重定擬俟盜風稍戢復舊並從之至年終審結積案千餘起予優叙京察復予議叙二十四年卒上甚惜之優詔賜卹贈總督銜諡恭愼論曰仁宗初政特重廉吏岳起荆道乾清操實政爲之冠謝啓昆張師誠才猷建樹卓越一時並專圻碩望矣李殿圖李奕疇錢楷亦各以明愼慈惠見稱和舜武課最簿書遂邀易名曠典王紹蘭一皆坐廢晚成經學殆有幸有不幸哉

清史稿

列傳一百四十七

司馬駒

王秉韶

紹興人

康基田

吳璥

徐端

陳鳳翔

黎世序

司馬駒字雲皋江蘇江甯人乾隆中大學士高晉爲兩江總督辟佐幕司章奏習河事以從九品留工効用授山陽主簿累遷淮安同知仍兼幕職從晉塞河屢有功薩載繼任總督亦倚之五十年奏擢江南河庫道道庫歲修六十萬溢額則俟上聞遇險工廳員借帑久輒因緣爲弊駒從容籌補公私具舉五十五年遷江西按察使在官七年巡撫簠簋不飭被劾多所牽連駒以謹慎獲免嘉慶元年遷山西布政使二年調山東兼管河務是年秋曹州河溢命駒偕兩江總督李奉翰南河總督康基田前山東巡撫伊江阿同任堵塞冬擢河東河道總督曹工尋合龍三年春西壩墊革職留任疏言豫東兩岸隄工卑薄請擇要

增高以禦汎漲詔以下游不能深通徒事加隄斥其不揣本而齊末曹工之墊由於堵築不堅罰駒等賠修奪翎頂所議工事仍允行九月睢州河溢詔免治罪責速塞四年正月工竣復頂戴議叙免其代賠帑銀尋卒於工次賜卹

王秉韜字含谿漢軍鎮紅旗人由舉人授陝西三原知縣累遷河南光州直隸州知州緣事降浙江按察司經歷改雲南知縣累遷山西保德知州有政聲五十五年擢安徽潁州知府因讞獄遲延罷職詔以原官發江蘇補淮安嘉慶二年復調潁州會教匪犯河南去潁州甚近秉韜慨然曰同爲守土臣豈可以畛域遺害乎與壽春鎮總兵定柱團結鄉勇數千勵以忠義助糧餉戰於境上破賊走之時大學士朱珪爲安徽巡撫器其才未幾擢廣西左江道復以在潁州失察逸犯罪議鍰級去官留治江南豐碭河工尋署廬鳳道泊仁宗親政朱珪薦之擢奉天府尹遷河南布政使五年擢河東河道總督秉韜老於吏事治河主節費隄埝單薄者擇要修築不以不急之工擾民河北道羅正堉信用劣幕舞弊曹考通判徐鼎張皇糜費並劾治之薪料如額採買河員濫報輒駁斥使

多積土以備異漲於是浮冒者不便其所爲言官遽論劾詔慰勉戒勿偏於節省七年防汛卒於工次秉韜性方正不沽名時疆吏中長麟汪志伊並以廉著秉韜不愜其爲人嘗曰長三汪六皆名過其實奚足貴繼其任者爲嵇承志承志大學士璜子由舉人官內閣中書累遷長蘆鹽運使五十九年天津海河溢築隄守禦高宗以承志無守土資能盡力特詔嘉之尋病歸嘉慶六年從侍郎那彥寶治水定河復授長蘆鹽運使七年署河東河道總督承志年已老上特以其家世習河事故任之八年河決封邱衡家樓次年塞決工竣召還京授大理寺少卿十年遷順天府尹尋卒

康基田字茂園山西興縣人乾隆二十二年進士授江蘇新陽知縣調昭文爲令幾十年遷廣東潮州通判以獲盜功晉秩同知累遷河南河北道調江南淮徐道治河有聲五十二年擢江蘇按察使命每年大汛赴淮徐襄河務六月河南睢州河溢基田奉檄馳往堵築次年遷江甯布政使兼河務如故五十四年署江南河道總督尋回任六月基田防汛睢南值周家樓河溢上游魏家莊大

婦翻陷基田壓焉援救得生詔嘉其奮勉特加恩資五十五年護理安徽巡撫以高郵糧胥僞造印串巡撫閔鶚元被嚴譴褫基田頂戴復以陳奏不實革職逮問遣戍伊犁尋許贖罪以南河同知用五十六年仍授淮徐道五十九年力守豐汎曲家莊隄特詔褒獎擢江蘇按察使調山東仍兼黃運兩河事嘉慶六年南河豐汎河溢基田赴工襄治遷布政使命回山東疏消漫水撫卹災民基田遂往來其間次年春豐工竣賜花翎擢江蘇巡撫秋河溢錫山楊家壩命馳視山東曹縣河亦溢復命往襄同堵築授河東河道總督尋調南河三年曹工合而復墊部議革職詔寬免疏言口門深逾十丈擬就二壩前河勢灣處開引河別築一壩即以舊西壩改作挑水壩俟秋後興工詔責其延玩褫翎頂尋命專任下游挑河事九月河南睢州河復溢水入渦濉諸河正河斷流大工旋合次年春睢工亦竣河歸故道引河通暢復翎頂時有條奏治海口及復舊制混江龍者基田疏言治河之法首在束水攻沙自曹工漫溢溜或旁趨遂致正河淤墊因上決而下淤非先淤而後決今睢工曹工既竣連年黃水漫衍所在停

沙比至清江會淮已成清水海口刷濬寬三百數十丈毋庸疏濬混江龍助水之力甚微不若束水攻沙以水治水之力大而功倍仁宗嘉納之秋河溢邵家壩十二月堵合未旬日壩復墊渗水責基田賠帑五年正月壩工失火積料盡焚革職留工効力基田畝下素嚴督率將卒守隄動以軍法從事稽延者杖枷不貸人多怨之又官吏積弊懼揭陰縱火以掩其跡帝亦知基田性剛守潔惟責其苛細仍命隨辦要工欲復用之及邵家壩工竣以知州用補江蘇太倉直隸州逾年擢廣東布政使調江西又調江甯十一年因貴州鉛船遲滯降調授戶部郎中十三年從協辦大學士長麟戴衢亨察視南河基田請修復天然閘迤東十八里屯二石閘斬輔所建也足以減黃濟運且山石夾峙無奪溜沖決之患據以入告帝嘉其留心河務加道銜賜花翎尋予太僕寺少卿職銜稽核南河要工錢糧十六年以年逾八旬乞休允之命來京就養以示優卹後議改建山盱五壩特命與議基田疏陳舊制盡善不宜輕改今仁義禮三壩石底損壞跌成深塘不得已爲變通之計請將仁義二壩先改其一俟大汎果見順利

再議添所建擬禮場先築草壩非湖水大漲不可輕放奏入報聞十八年鄉舉重逢賜三品卿銜與鹿鳴宴尋卒

吳璉字式如浙江錢塘人吏部侍郎嗣爵子乾隆四十三年進士選庶吉士授編修大考擢侍講學士典陝西鄉試五十四年督安徽學政召見高宗因其父曾爲總河詢以河務所對稱旨即日授河南開歸陳許道累遷布政使五十九年巡撫出視賑卹充鄉試監臨聞河水暴漲即出閭馳防帝嘉之六十年署巡撫嘉慶二年楚匪齊王氏犯河南擊走之復勦息縣匪賜花翎母憂留任四年署河東河道總督尋實授請增河工料價歸地糧攤徵詔斥其病民革職留任五年調南河堵合邵家壩漫口加太子少保八年秋河決衡家樓命豫籌來年漕運請疏邳州宿遷諸閘於宿遷桃源交界築束水草壩濬淤淺依議行又言徐州一帶河水寬深而未消落乃海口壅塞所致詔相度治之尋疏陳雲梯關海口暗灘尙非全被阻遏請於黃泥嘴開引河並挑吉家浦于家港倪家灘宋家尖諸灘尤之九年秋洪湖水漲未消請緩築仁智兩壩以保堰圩隄工時東

河衛工甫合清江浦河口水淺阻糧船上謂清水力弱由啟放仁智等壩所致
命侍郎姜晟往會籌蓄黃濟運啟與合疏請堵二壩及惠濟閘之鉗口壩使湖
水全力東注刷通河口並啟李工口門減掣黃水從之上終以啟多病治河不
力雖宥其罪命解職十年授兵部侍郎調倉場侍郎十一年復授河東河道總
督因料物例價不敷請依南河按時價折銷允之復請歲料劑價歸地糧攤徵
被嚴斥革職留任尋又以隄堰工需併入衛工善後題銷上切責之十三年召
回京授刑部尙書命偕侍郎托津赴江蘇鞠獄并勘議海口改道請仍復故道
接築雲梯關外大隄從之復授江南河道總督十四年疏陳海口應濬而大隄
不堅旁洩必淤蓄清爲要而隄壩不復遇漲必潰今開壩無減黃之路五壩無
節宣之方皆宜急爲救治詔題之令盡心經理是冬以海口挑復正河費用浩
繁不及於次年挑汎前舉工請權宜仍濬北潮河以通去路十五年春偕兩江
總督松筠合疏請修復正河詔允行而斥啟無定見前後矛盾責其認真督治
不得以事由松筠主持爲推諉之地尋因病乞假詔解職俟病痊以六部尙書

用礲既去任松筠疏論河工積弊謂礲與徐端治理失宜用人不當墊欵九十餘萬恐有冒捏又兩淮鹽政阿克當阿劾揚河通判繆元淳浮冒工欵稱礲路過揚州與言廳員營弁不肖者多往往虛報工程且有無工借支前在任六七年用帑一千餘萬今此數年竟至三四千萬詔斥礲知而不奏命尙書托津等往南河按之劾礲失察誤工又潛淮北鹽河未經奏陳濬後復淤詔切責降四級調用與徐端分賠鹽河工欵命礲赴南河襄辦王營減壩及李家樓漫口十七年補光祿寺卿累遷吏部侍郎十八年睢州河溢命赴南河察勘湖河十九年授河東河道總督督治睢工次年遷兵部尙書工竣回京歷刑部吏部協辦大學士上以礲練習河務無歲不奉使出勘河二十一年協防東河秋汛二十二年勘睢工及山東運河南河肅南民堰清江浦禦黃束清諸壩二十三年築沁河漫口二十四年築河南蘭陽儀封及武涉馬營壩決口二十五年勘南河束清禦黃諸壩及洩水事宜其間再署河南巡撫一署河東河道總督道光元年以病免二年因侍郎那彥寶治河不職降黜追論礲與同罪雖已致仕家居

視其翎頂尋卒

徐端字鑑之浙江德清人父振甲官江蘇清河知縣端少隨任習於河事入貲爲通判乾隆中河決青龍岡振甲知涉縣分挑引河端佐役大學士阿桂督工見而器之留束河任用授蘭儀通判尋升缺爲同知調睢甯又調開封下南河嘉慶三年署山東沂曹道睢州河決端預築曹州隄得無害四年擢江西饒州知府未之任調江蘇淮安七年擢淮徐道丁父憂與假治喪仍回任九年加三品頂戴護理束河河道總督時衡家樓甫塞決詔以前官王秉韶惜費松承志年衰修防多疏責端通籌全河爲未雨綢繆之計端疏陳臨河婦工固緊要無工之地尤須慎防仁宗睦之冬清口水淺阻漕船端偕尙書姜晟等往視請展引河啟祥符五瑞壩分河水入洪湖助清敵黃清口乃通尋授江南河道總督十年請疏治雲梯關沙淤培築桃源以下隄工又請移建河口束清壩於迤南湖水匯出之處以資節制挑清壩外築束清東壩對岸張家莊增築西壩留口門二十丈視湖水大小爲束展詔允行秋築義壩時命侍郎戴均元會籌蓄黃

濟運端與合疏請濬王營減壩以下鹽河遇盛漲相機啟放庶黃減淮強湖水暢出堰工亦免著重從之十一年洪湖異漲高堰賴新築子堰抵禦不爲害俄黃水並漲決鹽河民堰連河東岸荷花塘亦決以功過相抵免議舊制南河設正副總河後裁其副至是授戴均元爲河道總督端副之秋河決周家樓上游郭家房隄壑命端專治郭家房堵口四閱月工竣時黃水由減壩六塘河入海正河斷流羣議改道上頒示御製黃河改道記命端視察海口尋以六塘河下游水勢散漫難施工作復頒示御製治舊河記命端專駐減壩督工十二年春工竣河循故道加太子少保秋海潮上漾河由陳家浦旁溢入射陽湖歸海請於黃泥嘴建壩擇要疏淤俾仍故道十三年署正總河先是端屢言河淤由於海口流緩宜接築雲梯關外長隄束水攻沙未及舉至是兩江總督鐵保疏申前議並請培高堰土坡修補智禮二壩以備湖漲復毛城鋪石隄王營減壩以節宣黃水端贊其議命協辦大學士長麟戴衡亨察視惟輟毛城鋪壩工改建徐州十八里屯雙閘餘依原議行夏湖水漲端以智信二壩不敷宣洩壞磚工

百餘丈礮翎頂降三級留任尋堵合復之時黃水由馬港口分流經灌河口歸海命尙書吳璫侍郎托津會勘以荷花塘壩工垂成復鰲降端爲副總河十五年復授河道總督裁副總河端始終主復舊海口堵馬港命尙書馬慧裕會同督治兩江總督松筠劾端於河流逢灣取直以致停淤上不直其奏端疏辨詔松筠無預河務資端與慧裕速施工勿游移尋以洪湖風汛壞高堰山旰兩廳工甚鉅革職留任松筠復密陳端祇知工程不曉機宜糜帑千萬迄無成功且恐有浮冒之弊詔斥端不勝河督之任革職留工專任堵築義壩十六年命以通判用復命治李家樓引河十七年工甫竣病卒端治南河七年熟諳工作葦柳積隄一過測其多少與夫役同勞苦廉不妄取河工積弊端知之憚於輕發欲入覲面陳而終不得以至於敗繼之者爲陳鳳翔河事遂益敝

陳鳳翔字竹香江西崇仁人謄錄議叙縣丞發直隸河工累遷永定河道嘉慶六年畿輔大水河決者四鳳翔從侍郎那彥寶塞決爲仁宗所知逾年丁父憂賜金治喪後復授永定河道十四年擢河東河道總督逾年調南河時南河敝

壞已久河湖受病日深詔以蓄清敵黃爲急務其要在修復高堰之堤責鳳翔
尅期程工尤以借黃濟運爲戒十六年疏陳急治河口及運河各工高堰二堤
亦次第興辦尋偕兩江總督勒保奏報堵合禦黃鉗口兩壩疏末微言海口北
岸無人烟之地面而皆水俟秋間水落相機辦理上以上年堵築馬港兩岸皆
新堤北岸地勢尤高明是新決諱飾責令據實奏聞適王營減壩土隄又決詔
切責革職留任尋奏王營減壩旁注由海口逼緊水無他路致有漫溢請俟水
落修築減壩海口但保南岸勿築北岸以免水逼援引高宗諭旨雲梯關外勿
與水爭地詔以從前瀕海沙灘無居民今則馬港口外現有村落非昔可比且
水勢散漫河緩沙停弊不勝言又鳳翔等所繪海口圖無村落地名與十三年
吳璥所呈圖說不同河形曲直亦異斥鳳翔意存朦混恃才妄作前稱雲梯關
外溜勢暢達未挑處刷深至十餘丈可見海口非高仰鳳翔既未身歷其境今
因北岸漫溢束手無策反言從前挑築皆屬非計以相抵塞特簡百齡爲兩江
總督與鳳翔同勘海口鳳翔謂海口不能暢下壅故上潰諉爲淮海道黎世序

所言而世序實謂下壅在倪家灘新隄上下非在海口及百齡至親勘海口深
通惟中段淤成平陸乃去歲挑河積土河灘春水漫刷仍歸河內又隔潮壩放
水時壩根起除未淨阻水停淤世序屢請籌辦鳳翔視爲緩圖詔斥因循貽誤
會上游繇山拐李家樓兩處漫口革職留任十七年春禮壩又決百齡劾鳳翔
急開遲閉壩下衝動不早親勘堵築用帑二十七萬兩有奇而壩工未竣清水
大洩下河成災嚴詔斥鳳翔貽誤革職罰賠銀十萬兩荷校兩月遣戍烏魯木
齊尋鳳翔訴辨命大學士松筠府尹初彭齡按訊得百齡與鳳翔同時批准開
壩狀鳳翔又訐百齡信任鹽巡道朱爾廣額督辦葦蕩柴料捏報邀功譴百齡
等鳳翔免枷仍赴戍未行病歿

黎世序初名承惠字洪溪河南羅山人嘉慶元年進士授江西星子知縣調南
昌擢江蘇鎮江知府十六年遷淮海道與河督陳鳳翔爭堵倪家灘漫口由是
知名十七年調淮陽道尋鳳翔黜詔加世序三品頂戴署南河河道總督俟三
年後果稱職始實授疏言自上年大濬千里長河王營減壩及李家樓漫口堵

合雲梯關外水深二三丈至四五丈爲近年所未有而清江浦至雲梯關一帶較之河底深通時尙高八九尺此非人力所能猝辦計惟竭力收蓄湖水以期暢出敵黃蓄清之法在堰盱二隄有旨緩辦今年禮壩跌損宣洩路少二隄尤應急築以資捍衛允之十八年以仁義禮三壩基壞請於蔣家壩附近山岡移建三壩挑引河三道詔令詳議並飭填實舊壩尋如議行因全漕渡黃較早議叙疏請加高徐州護城石工添築越隄於清江浦汰黃隄外加重隄又於駱馬湖尾間五壩迤下添碎石滾壩並允之先是百齡擬於清江浦石馬頭築圈隄其灣處對王營上起禦黃壩下屬貼心壩河寬千餘丈至此陡東爲二百丈論者以爲不使得不行世序卒成之是年秋睢南薛家樓桃北丁家莊漫水壞隄世序躍入河者再會上游河南睢州決口奪溜河水陡落睢桃兩工得補築無事詔以世序不能先事預防降一級留任睢州決口久未合黃水全入洪湖世序力籌宣洩潒順清河於清口淤窄處自東清壩起至禦黃壩止挑引河三束清壩鉗口各壩一律闢展智仁兩壩及蔣壩以南新挑仁義兩壩引河並爲分

減之路至十九年霜降安瀾詔嘉世序修防得宜加二品頂戴二十年疏言徐州十八里屯舊有東西兩閘金門寬三丈五尺不足減水其西南虎山腰兩山對峙四處寬二十餘丈山根石脚相連可作天然滾壩北面臨河即十八里屯山岡淤於土中削平山頂改作臨河滾壩以虎山腰爲重門擎托可期穩固尤之夏洪湖盛漲拆展束清禦黃兩壩啓山盱引河滾壩清水暢出會黃東注刷河益深特詔嘉獎賜花翎世序治河力舉束水對壩課種柳株驗土埽稽垛牛減漕規例價行之既久灘柳茂密土料如林工修河暢南河歲修三百萬兩爲率每年必節省二三十萬碎石坦坡自靳輔始用之於高堰後蘭第錫吳璥徐端偶一用之世序始用之於通工謗言四起世序力持卒獲其效二十一年京察議叙二十二年因禦黃壩刷深不能施工束清壩掣溜太急亦難穩立請於舊二壩水淺處添築重壩又於束清壩外添建一壩以爲重門鉗束於是比歲安瀾奏減料價一成道光元年入覲宣宗嘉其勞勩加太子少保開復一切處分賜詩以寵之二年京察復予議叙四年卒於官優詔褒卹加尙書銜贈太子

太保設襄勤入祀賢良祠江南請祀名宦建專祠帝追念前勞御製詩一章命勒石於墓賜其子學活主事學淵舉人學澄副榜貢生自乾隆季年河官習爲奢侈帑多中飽寢至無歲不決又以漕運牽掣當其事者無不黷敗世序潛泊甯靜一瀟靡俗任事十三年獨以恩禮終焉幕僚鄒汝翼無錫人世序倚如左右手欲援陳潢故事薦之於朝力而辭止涇縣包世臣號知河事世序多用其說惟築閘堰一事論不合及創虎山腰淤壩世臣阻之曰河以無溜爲至險攻大埽不與焉湖以淤底爲至險墾石工不與焉公謂減黃入湖爲化險爲平黃緩湖高吾坐見其積平成險也兩險交至其禍甚烈公意在及身然以憂患貽後世已世序初奏亦謂壩成遇不得已乃啟然後實無歲不啟泊二十五年上游河南睢州馬營兩口既合閘歲大汛至清河安東阜甯三縣境內河水常平隄而中泓無溜世序心知其害憂瘁而卒後數月高堰竟決

論曰仁宗銳意治河用人其慎然承積弊之後求治愈殷窺穴於弊者轉益譎張以爲嘗試海口改道之說起紛紜數載而後定康基田徐端等皆諳習河事

程功亦僅至黎世序宣勤久任南河乃安而減黃病湖遂遺隱患得失之故具於斯焉